

22. oktober 2013

UKA 2013/91  
Per Berthelsen

**Alta-mi inaarutaasumik isumaqatigiissutip (The Alta Document) taassumalu nassatarisaanik pingaarnertut kaammattuutigineqartut 4-it, nunat tamalaat akornanni nittarsaanneqarnissaanut, kiisalu Naalagaaffiit Peqatigiit nunat inuii pillugit 2014-imi nunarsuaq tamakkerlugu ataatsimeersuartitsinissaanut inaarutaasumik isumaqatigiissutip Naalagaaffiit Peqatigiit 68-issaa Ataatsimeersuarneranni pisortatigoortumik allagaatigilissagaat pillugu Naalakkersuisut suliaqaqqullugit Inatsisartut aalajangiiffigisassaattut siunnersuut.**

(Inatsisartunut ilaasortaq Sara Olsvig Inuit Ataqtigiit)

Sara Olsvigip, Inuit Ataqtigiit, Inatsisartunut aalajangiiffigisassanngorlugu siunnersuutigaa Naalakkersuisut peqquneqassasut, Alta-mi inaarutaasumik isumaqatigiissutip taassumalu nassatarisaanik pingaarnertut kaammattuutigineqartut 4-it nunat tamalaat akornanni nittarsaanneqarnissaat, kiisalu FN-imi nunat inoqqaavi pillugit Nunarsuarmioqatigiit Isummersoqatigiinnissaanni inaarutaasumik isumaqatigiissutip taassuma pisortatigoortunngortinnissaa. Tassa 2014-imi FN-ip 68-issaannik Ataatsimeersuarneranut atatillugu ingerlanneqartussami.

Inaarutaasumik isumaqatigiissutip pineqartup siunertaa tunngaviilu tamakkiisumik siunnersuuteqartup saqqummiutereemagit Siumut sinnerlugu uteqqiissanngilanga. Naalakkersuisut aamma siunnersuummik paasinnilluarlutik akissuteqarput kissaatigalugulu aappaagu FN-imi nunat inoqqaavi pillugit Nunarsuarmioqatigiit Isummersoqatigiinnissaat iluat-silluarumaartoq.

Siumup taamatut oqaaseqarluni siunnersuut tamanit isumaqatigiissutigineqarmat Ataatsimiititaliamut suliaqqiissutigineqaaqqaarnissaa pisariaqarsorinagu, siunnersuutip taamatut isikkoqarluni aappasaanik suliarineqarnissaa innersuussutigaa.